

sors foies fruit de dix journée en un jor. Et les grant sire à ceste tielz homes ne prant nul treu, mès fait lor doner dou sien et des chevaus qe je vos ai dit, qe sunt tant por les postes por les mesajes porter. Voz di tout voiremant qe le sire grant les ensi establi, car il dit qui est près à la tel poste la tiel cité, et il fait veoir quantch evalz puet tenoir por les mesajes, et l'en li dit cent, et il li est comandé qe il metrent à la tel poste cent chevaus, puis fait veoir toutes les autres viles et chastiaus quant chevaus puent tenir et celz qu'il puent tenir, et elz comande qu'il tiennent à la poste. Et en tel maineres sunt ordenée toutes les postes, si qe rien ne i met le grant sire, for tant seulemant qe les postes des leu desvoiables fait-il fornir de sez chevaus propes. Et si voz di qe quant il est beinzonz qe mesajes de chevaus aille tostainement por conter au grant sire d'aucune tere qe soit revellés, ou d'aucun baron, ou des chouses qe soient beizognables au seingnor, il chevauchent bien deus cent miles en un jor, ou voir deus cent cinquante, et voz mostrerai raison comant. Quant les mesajes vuelent aller si tostainement et tantes miles en un jor con je voz ai contés, il a la table dou gerfaus, en senifiance qe il vult aler tostainement. Se il sunt deus, il se muent dou leu où il sunt sor deus buens chevaus fors et corant, il se bindent tout lor ventre, et lien lor chief, et se metent le grant cors tant con il plus puent, et corent tant qu'il sunt venus à l'autre poste de vingt cinq miles, et adonc treuvent autre deus chevaus aparoilés, frès et repousés, et corant. Il montent tant tosto qu'il ne se repousent ne pou ne grant; et quant il sunt montés, il se metent maintenant tant com il puent dou cheval traire, et ne restent de corer tant qu'il sunt venus à l'autre poste, et iluec treuvent les autres chevaus aparoilés, et il montent ausi erament et se metent (à) la voie. Et ensi font dusqe au soir : et en ceste mainere qe je voz ai contés vont cesti tiel mesajes bien 250 miles per apporter nouvelles au grant sire, et encore quant il beizogne vont-il bien trois cens, et cesti tielz mesajes sunt mout préziés<sup>1</sup> ».

1. MARCO POLO, *Ed. Soc. de Géog.*, pp. 111-113.